



Uunga siunnersuut: Meeqqanut tapiissutit pillugit Inatsisartut inatsisaata allangortinnera pillugu Inatsisartut inatsisaat nr. xx, xx. xxx 2018-imeersoq
(Naatsorsuinnermut periaaseq nutaaq, aningaasarsiat akileraarutaasussat maannakkorpiaq aningaasarsianit taarserneqarput aamma procenti aaqqiissutissaq atorlugu meeqqanut tapiissutit aaqqiivigineqartarneri)
(Isumaginninnermut Inatsisinillu Atuutsitsinnermut Naalakkersuisoq)
(Siullermeerneqarnera)

Demokraatinut pingaaruteqarpoq inunnik isumaginninnermi ikiorsiissutit ima aalajangersarneqarsimassasut tamatigut sulineq akilersinnaassalluni pisortanit pilersorneqarnermut naleqqiullugu.

Taamaattumik iluarisimaarparput 2017-imi meeqqanut tapiissutit iluarsartuusseqqinnerup inatsimmut ilanngunneqarnissaa aalajangerneqarnikummat, qularnaarlugu malittarisassatoqqanut naleqqiullugu angajoqqaanut sulinerup akilersinnaanerunissaa angerlarsimaannarnermut naleqqiullugu.

Malittarisassat qanganitsat atuukkallarmata ima ajorsimatigivoq allaat kisermaa qilersuisoq ukiumut 178.000 koruuninik isertitaqartartoq akissarsiamigut akunnermut 1,50 koruuninik qaffaavigineqarsimappat taava akissarsiakinnerulertarsimavoq meeqqanut tapisiat ikilineqartarsimammata. Tamannalu sulinerunissamut kajumissaataasimangilaq.

Tamatuma saniatigut meeqqanut tapiissutit isumaginninnermi ikiorsiissutit tunniunneqartartuni kisiartaallutik sulit ukiumoortumik aningaasanut inatsisini oqaasertaliussatigut aalajangersarneqartarput. Isumaqaataavugut naapertuunnerummat inatsimmut ilanngunneqarnissaa, tamannalu pissaaq manna inatsit aqutigalugu.

Taamatut oqaaseqarluta siunnersuutip Ilaqutariinnermut Peqqissutsimullu ataatsimiititaliamut innersuupparput.